

## انقلاب رهبری: سوریه‌ده نظامی دخالت قطعاً آمریکانین ضررینه‌دی

اسلامی انقلابین رهبری حضرت آیت‌الله العظمی خامنه‌ای، چهارشنبه گونو 11-جی دولتین بیرینجی گۆروشنوده آقای روحانی‌نی مطلوب، اعتمادلی و آیدین انقلابی سابقه‌لی اولان رئیس جمهور آدلاندیریب، مطلوب دولتین مهم شاخصلرین سایماغینان آرتیردی‌لار: اقتصاد و علمی بیرینجی اولویتیده یئرلشدیرین و باهالیغی مهار ائله‌ماغینان و اقتصاد عرصه‌سینده تحرک و آرامشی یاراتماغینان جماعتین گله‌جاغا اولان اومیدینی آرتیرین. اونلار هابئله آمریکانین سوریه‌ده نظامی دخالتینه تهدید ائله‌ماغینی منطقه‌یه قطعی فاجعه ساییب تأکید ائله‌دی‌لر: هر جور دخالت و جنگ دالیسیجان اولماق حتماً اود یانديرانلارین ضررینه اولاجاق. حضرت آیت‌الله خامنه‌ای منطقه‌نین بحرانلی و حساس اولدوغونا اشاره ائدی‌ب دئدی‌لر: بیزیم مصرین داخلی ایشلرینده دخالت ائله‌ماق قصدیمیز بوخودر اما مصر جماعتی‌نین اؤلدورولمه‌سینه ده گۆز پوما بيلمه‌روق. اونلار تأکید ائله‌دی‌لر: بیز سیلاحسیز اولان مصر جماعتی‌نین اؤلدورولمه‌سینی محکوم ائلی‌روق. اسلامی انقلاب رهبری آرتیردی‌لار: بو قیرغی‌نین عاملی هر کیم اولسا، جمهوری اسلامی طرفیندن محکوم‌دور. حضرت آیت‌الله خامنه‌ای دئدی‌لر: مصرده داخلی جنگدن چکینماق لازمدیر چونکی مصرده داخلی جنگ، اسلام دنیاسی و منطقه‌یه بیر فاجعه ساییلیر. اسلامی انقلاب رهبری سوریه حادثه‌لری باره‌ده و آمریکانین تهدید و محتمل دخالتینی منطقه‌یه فاجعه بیلیم تأکید ائله‌دی‌لر: بئله بیر ایش اولسا حتماً آمریکالیلار افغانستاندا و عراقدا اولدوغو کیمی ضرر گۆره‌جاق‌لار. اونلار تأکید ائله‌دی‌لر: بو جنگ سالماق، باروت امارینا جرقه کیمیدیر کی اونون ابعادی و نتیجه‌لری بللی اولمایاجاق.